

Kommunini ileqqoreqqusanut malittarisassat

Kapitali 1

Atuuffii

1.1. Malittarisassat makkua kommunini maleruaqqusanut, Inatsisartut inatsisaat, Inatsisartut peqqussutaat imaluunniit Namminersorlutik Oqartussat nalunaarutaat naapertorlugu aalajangersarneqartunut, taakkua innuttaasunut maannakkut atuussimappata, atuupput.

1.2. Kommunini maleruaqqusat, imm. 1.1.-imi piumasaqaatinik naammassinnittut, atuutsinneqarsinnaanissaminnut tamanut nalunaarutigineqassapput. Kommunini maleruaqqusat allat tamanut nalunaarutigineqassanngillat, aammalu malittarisassani matumani pineqartunut aamma ilaatinneqaratik.

1.3. Kommunini maleruaqqusat malittarisassani matumani pineqartunut ilaatinneqartut, inatsisitigut Namminersorlutik Oqartussat nalunaarutaattut isigineqarput, kommunalbestyrelsimit akuerineqartussaanerannut aalajangersarneqartussaanerannullu, aammalu Naalakkersuisut akuersisussaanninnerannut, naleqqussarneqarlutik.

1.4. Kommunini maleruaqqusat malittarisassani matumani pineqartunut ilaatinneqartut, imarisamikku Namminersorlutik Oqartussat nalunaarutaannut piumasaqaatit assingi naammassisimassavaat. Kommunini maleruaqqusat taakkua aqqissuunnerinut il.il. Namminersorlutik Oqartussanut nalunaarutaannut teknikkikkut piumasaqaatit taamatuttaaq naammassisimassavaat.

Kapitali 2

Kommunini maleruaqqusanik suliaqarneq

2.1. Kommunit suliaasaqarfimmik iluanni kommunini maleruaqqusanik suliaqarnissamut akisussaasuupput.

2.2. Kommunip atorfilittaasa Naalakkersuisuni Naalakkersuisoqarfik suliaasaqarfimmut akisussaasuusoq kommunini maleruaqqusanik suliaqarnermi ilitersorneqarnissamik siunnersorneqarnissamillu qinnuigisinnaavaa.

2.3. Kommunip atorfilittai kommunini maleruaqqusat kiisalu taakkununga piumasaqaatit pillugit nalinginnaasunik apeqquaqarlutik administration Inatsiseqarnermut immikkoortortamut saaffiginnissinnaapput.

Kapitali 3

Naalakkersuisoqarfimmi suliaasaqarfimmut akisussaasuusumi aamma Inatsiseqarnermut immikkoortortami misissuineq

3.1. Kommunini maleruaqqusat kommunalbestyrelsimit akuerineqannginneranni, kommunip maleruaqqusat Naalakkersuisoqarfimmi suliaasaqarfimmut akisussaasuusumi misissorneqartussanngorlugit nassiutissavai.

3.2. Kommunini maleruaqqusat inatsimmi tunngavissaminik qaangiisimannginnersoq kiisalu aqqissuunneranut teknikkikkut piumasaqaatit naammassineqarsimanersut, Naalakkersuisoqarfiup suliaasaqarfimmut akisussaasuusup misissussavaa.

3.3. Naalakkersuisoqarfik suliassaqaarfimmut akisussaasuusup tamatuma kingorna kommunini maleruaqqusat Inatsiseqarnermut immikkoortortamut nassiutissavai, tassani kommunini maleruaqqusanut imarisaannut teknikkitaannullu piumasaqaatit kommunini maleruaqqusani naammassineqarsimanersut, kiisalu tamanut nalunaarutigineqarnissamut piareersimanersut, misissorneqassalluni.

3.4. Inatsiseqarnermut immikkoortortap kommunini maleruaqqusat Naalakkersuisoqarfik suliassaqaarfimmut akisussaasuusumut nassiutissavai, taassuma kommunimut ingerlateqqissallugit.

Kapitali 4

Kommunini maleruaqqusat tamanut nalunaarutigineqarnerat

4.1. Kommunini maleruaqqusat kommunalbestyrelsimit akuerineqareerneranni borgmesterip kommunalbestyrelsi sinnerlugu maleruaqqusat atsiussavai.

4.2. Kommunini maleruaqqusat atsiorneqareersut Naalakkersuisoqarfik suliassaqaarfimmut akisussaasuusumut pdf-nngorlugit elektroniskimik nassiunneqassapput aammalu word-fil-it aamma ilanngunneqassallutik. Kommunip pappiaranngorlugu atsiugaq allaqqaarnera tigummiinnassavaa.

4.3. Malittarisassat Naalakkersuisunit imaluunniit Naalakkersuisumit aalajangersarneqassasut imaluunniit akuerineqassasut inatsimmi tunngavigineqartumi piumasaqaataappat, Naalakkersuisoqarfik suliassaqaarfimmut akisussaasuusup piumasaqaatip taassuma naammassineqarnissaa isumagissavaa.

4.4. Naalakkersuisoqarfik suliassaqaarfimmut akisussaasuusup tamatuma kingorna maleruaqqusat inaarutaasumik atsiorneqareersut Tamanut nalunaarutiginninnermut allakkanik nakkartitsisarfimmut (saqummiussineq@nanoq.gl) pdf-nngorlugu elektroniskimik nassiunneqassaaq aammalu word-fil-it aamma ilanngunneqassallutik.

Kapitali 5

Atuutilersitsinermit ikaarsaarnissamullu aalajangersakkat

5.1. Malittarisassat makkua ulloq 1. maj 2023 atuutilerput.

5.2. Peqatigisaanik inatsimmi imaluunniit nalunaarummik tunngavilimmik kommunini maleruaqqusat nalinginnaasumik pilertarnerannut suliat ingerlanissaannut pilersaarut 9. februar 2017-imeersoq aammalu kommunini maleruaqqusat aalajangersarneqartarnerat tamanullu nalunaarutigineqartarnerat pillugu ilitersuut 9. februar 2017-imeersoq atorunnaarsinneqarput.

5.3. Malittarisassani makkunani aammalu Inatsisilioriaatsinut malittarisassani 1. november 2011-meersuni aalajangersakkat imminnut naapertuutinnginneranni, malittarisassani makkunani aalajangersakkat malinneqassapput.

Inatsisilerinermit immikkoortortaqaarfik, ulloq 28. april 2023

Jógvan Svabo Samuelsen

Inatsisileriffimmi pisortaq

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut